



Broj: 04-04-4-214/21

Datum: 22. 1. 2021.

Saopćenje za javnost povodom članka objavljenog na internet-portalu The Bosnia Times

U vezi s člankom objavljenim 21. 1. 2021. godine na internet-portalu The Bosnia Times: „ZAŠTO JE URED ZA REVIZIJU BIO U ZAVODU? Hulusić: Ured za reviziju došao je po pozivu, revidirali su instituciju i sačinili izvještaj i preporuke“ i reakcijom na natpise u medijima objavljenom na zvaničnoj internet-stranici Zavoda za izgradnju Kantona Sarajevo od 21. 1. 2021. godine, Ured za reviziju institucija u FBiH daje Saopćenje:

U skladu s članom 12. Zakona o reviziji institucija u Federaciji BiH („Službene novine FBiH“, broj 22/06), generalni revizor, nakon konsultacije sa zamjenikom generalnog revizora, svake godine donosi godišnji plan revizija za narednu godinu, uzimajući u obzir i zahtjeve u skladu sa Zakonom. Plan revizija dostavlja se Parlamentarnoj komisiji odgovornoj za reviziju kao informacija prije početka naredne fiskalne godine.

Zavod za izgradnju Kantona Sarajevo uputio je Zahtjev za finansijsku reviziju institucije 23. 4. 2018. godine, u kojem se navodi da nikad nije vršena revizija poslovanja Zavoda, te se traži da se razmotri izvršenje finansijske revizije u sljedećem planskom periodu.

Ured za reviziju je 26. 4. 2018. godine poslao Odgovor na taj Zahtjev, u kojem je navedeno da se godišnji plan revizija donosi u skladu sa Zakonom, te da će Ured, shodno raspoloživim kapacitetima i kriterijima i nakon izvršene analize rizika, razmotriti mogućnost planiranja finansijske revizije Zavoda u narednom periodu.

Plan revizija za 2019/2020. donesen je 25. 10. 2019. i zasniva se na zakonskim obavezama i nadležnostima, analizi rizika, strateškim ciljevima, raspoloživim ljudskim i materijalnim resursima, finansijskoj značajnosti, složenosti institucije i kompleksnost transakcija, mišljenju revizora datom u prethodnoj reviziji, zahtjevima za finansijsku reviziju, a u obzir se uzima i to da li su subjekti utvrđeni planom ranije revidirani. Na osnovu svih navedenih kriterija donesen je plan revizija u kojem je predviđen i Zavod za izgradnju Kantona Sarajevo.

Dakle, Ured za reviziju institucija u FBiH ne obavlja reviziju ni po čijem zahtjevu ili pozivu, već isključivo u skladu s planom koji se donosi shodno članu 12. Zakona, ili kao specijalnu reviziju shodno članu 18. Zakona.



GENERALNI REVIZOR

Dževad Nekić